

hujusmodi imposterum abstinere debeant; in contravenientes porro praeter committendorum damnorum bonificationem, parti laesae praestandam, praeterea aliter severe animadvertetur.

De metarum inter vicinas provincias, ita et dominium Csaktornya rectificatione.

Articulus 35.

Justum esse agnovit Sua Majestas Sacratissima: ut ad tenorem articuli 53. An. 1741. in eodemque citatorum Art. 39. An. 1715. et Art. 17. An. 1723. inter Regnum et vicinas Styriae et Carnioliae provincias, quemadmodum et pro conformitate articuli 116. An. 1715. inter Regnicolas et Dominium Csaktornya jam a tot annis vigentibus metalibus controversiis medio commissariorum, ex parte quidem Suae Majestatis Sacratissimae per eandem Suam Majestatem Sacratissimam; ex parte vero Regni Croatiae et Sclavoniae per Dominum Comitem Banum, et Status ac Ordines eorundem Regnorum denominandorum finis tandem imponatur; in id autem connitendum, ut minoribus, quo fieri poterit, sumptibus id fiat. Quoad decimas districtus Metlike Capitulo Zagrabiensi tenore citati Articuli 53. An. 1741. hic loci confirmati restituendas, accepta uberiore desuper informatione, regiam Suam assistentiam clementissime resolvit Sua Majestas Sacratissima.

De Judicatu comitatensi etiam in causis supremorum et vice-comitum activis et passivis, secundum tenorem articuli 35. anni 1729. in Regnis quoque Dalmatiae, Croatiae et Sclavoniae observando.

Articulus 36.

In luculentum caesareo-regiae benignitatis argumentum annuit clementissime Sua Majestas Sacratissima: ut in Regnis quoque Dalmatiae, Croatiae et Sclavoniae in causis supremorum et vice-comitum activis et passivis, forum comitatense respicientibus, non amplius Tabula Regnorum illorum Judiciaria, verum pro tenore articuli 35. anni 1729. vice-comites comitatum et respective judices Nobilium procedant, procedendique facultatem habeant.

De infrascriptis militarium abusibus moderandis et educillis per eosdem, prout et alios infrascriptos officiales non servandis.

Articulus 37.

Circa extraordinarias in confiniis Gradiscano, Brodensi, Danubiali et Savano per officiales militares introductas et ab animalibus, curribusque incassari solitas, miseramque contribuentem plebem gravantes exactiones, accepta praevia informatione, pro justo et aequo sese resoluturam; quemadmodum et constituto con-